
Халқ депутатлари Риштон туман кенгашиning навбатдан ташқари сессияси

Халқ депутатлари Риштон туман Кенгашининг навбатдан ташқари сессияси бўлиб ўтди.

Унда вилоят ҳокими, Ўзбекистон Республикаси Олий Мажлиси Сенати аъзоси Шуҳрат Ғаниев иштирок этиб, туманда ижтимоий-иктисодий ислоҳотларнинг бориши, йўл қўйилаётган камчиликлар ва уларнинг ечими ҳақида маъруза қилди.

Маърузада таъкидлаб ўтилганидек, туманда ижтимоий-иктисодий, маданий-маърифий соҳаларда бир қатор ютуқларга эришилган бўлсада, айрим раҳбарларнинг бепарволик кайфиятига берилиши бунга салбий таъсир кўрсатган.

Туманда кейинги вақтларда кўплаб устувор вазифаларнинг бажарилмаслиги туфайли салбий кўрсаткичлар ортиб кетган. Масалан, ҳудуддаги ҳал қилиниши зарур бўлган масалалардан бири – тоза ичимлик сувига бўлган эҳтиёж аксарият маҳаллаларда ҳамон муаммолигича қолмоқда. Газ таъминотида ҳам бартараф этилиши зарур бўлган муаммолар бор. Республика ишчи гуруҳи томонидан тумандаги барча маҳалла фуқаролар йиғинларида олиб борилган ўрганишларда ҳам асосий муаммолар куз-қиши мавсумига тайёргарликдаги сусткашликлар, соғлиқни сақлаш ва таълим, уй-жой ҳамда ижтимоий муҳофаза тизимидағи камчиликлар сифатида қайд этилган.

Тадбиркорлик субъектларининг мавжуд имкониятлардан тўла фойдаланилмаётгани, экспортни ривожлантиришда тумандаги ўсиш ортда қолаётгани танқид қилинди. Соҳа ва тармоқларда шу каби қатор ҳолатлар атрофлича таҳлил этилди.

Вилоят раҳбари сессия ишида жиноятчилик ва ҳуқуқбузарликларнинг олдини олиш борасидаги чора-тадбирлар ҳам етарлича ташкил этилмаганини таъкидлаб ўтди. Биргина 2017 йилнинг ўзида 43 та маҳалла фуқаролар йиғинида турли жиноятлар содир этилгани, уларнинг аксариятида хотин-қизларнинг иштирок этгани ачинарлидир.

Юқоридаги камчиликларга йўл қўйган Ғайрат Мамадалиевни туман ҳокими вазифасидан озод этиш, шу кунга қадар Сўх тумани ҳокими бўлиб ишлаган Таваккалжон Раҳимовни Риштон тумани ҳокими этиб тайинлаш тўғрисида вилоят ҳокимининг қарорлари халқ депутатлари туман Кенгаши депутатлари томонидан бир овоздан тасдиқланди.

Музокараларда келгусидаги вазифалар ҳақида сўз борди ва тегишли чора-тадбирлар белгилаб олинди.

Мадаминжон СОЛИЖНОВ.

2018-02-08 16:53:37